



Las novas policistas ed ils novs policists èn vegnids saramentads en la sala dal cussegl grond.

FOTOS G. N. STGIER

«Vus essas il maletg da la polizia»

Cuira: Brevetaziun tar la polizia chantunala

DA GION NUTEGN STGIER / ANR

■ La polizia chantunala dal Grischun ha a partir d'immediat trais novas policistas e 14 novs policists. Suentar la scolaziun da basa rinforzan els uss il corp da la polizia chantunala dal Grischun cun passa 400 umens e dunnas. Trais dunnas e 14 umens han absolvi durant in onn la scola da polizia ad Amriswil (TG) ed èn gia stads activs – en il rom d'in praticum – durant intginas emnas en il chantun Grischun. Venderdi avantmezdi èn ellas ed els vegnids brevetads en in rom festiv en la sala dal cussegl grond. A partir dal 1. d'october 2015 fan ellas ed els uss uffizialmain part da la polizia chantunala dal Grischun – cun tut ils dretgs e cun tut las obligaziuns che resultan dal servetsch da polizia. L'empermischun correspundenta sur la bandiera dal Grischun han ellas ed els fatg durant la festa da brevetaziun. Ultra da las confamigliaras e dals confamigliars da las brevetadas e dals brevetads èn er numerusas represchentantas e numerus represchentants da la politica e da l'administraziun sco er d'organiziun partenarias sa participads a la festa.

Il cumandant è stà preschent gia ils emprims dus dis

Il cumandant da la polizia chantunala dal Grischun, colonel *Walter Schlegel*, ha accumpagnà las absolventas ed ils absolvents da la scola da polizia durant l'entir onn da scolaziun. Per el èsi impurtant d'emprer ad enconuscher bain sias novas collavuraturas e ses novs collavuratur. Perquai ha el passentà gia



In punct emoziunal per scadin nov policist è bain la saramentaziun.

ils emprims dus dis da la scolaziun ensem cun la scola da polizia. En vista al mintgadi da lavur che suonda ussa ha Schlegel appellà a sias novas collavuraturas ed a ses novs collavuratur da reagir da tut temp ed er en situaziuns difficilas cun persvasiun. «Vus stuais adina esser conscients dal fatg che Vus essas engaschads per la segirezza da la populaziun», ha declarà Schlegel. Las novas policistas ed ils novs policists sajan er suttemess als dretgs ed a las obligaziuns da la polizia chantunala. Responsabladad, ina buna tenuta, acceptar critica e lavurar en cuminanza, quai sajan er aspects ch'els hajan d'acceptar, ha punctuà Walter Schlegel. Ultra da quai ha el er ditg als anteriurs aspirants ed aspirantas: «Vus essas il maletg da la polizia chantunala.»

«Vus dastgais esser superbis da pudair As engaschar per la segirezza»

Il cusseglier guvernativ *Christian Rathgeb* ha gratulà a las novas policistas ed als novs policists che han fatg lur examen final cun success. Il schef dal departament da giustia, segirezza e sanadad ha ditg a las novas collavuraturas ed als novs collavuratur: «Vus dastgais esser superbis da far part a partir dad oz da la polizia chantunala dal Grischun e da pudair as engaschar per la segirezza en quest chantun.» La polizia chantunala dal Grischun saja in corp da polizia modern, bain scolà, bain equipà ed haja ina direcciun effizienta, ha Rathgeb continuà. Ultra da quai sajan policistas e policists er ambasadurs da noss chantun cun er vegnir en contact cun blers giasts e bleras persunas da l'exteriur.

Tgi lavura nua

- Balzer Remo*, basa da la polizia da trafic San Bernardin
- Bernhard Gian Andrea*, basa da la polizia da trafic Silvaplauna
- Boner Andreas*, post da polizia Scuol Casanova
- Adrian*, post da polizia Scuol Christoffel
- René*, post da polizia Puntraschigna
- Chumthong Kritsada*, post da polizia Glion
- Demont Andrea Celest*, basa da la polizia da trafic San Bernardin
- Falvo Clarissa*, post da polizia Roveredo
- Gubser Adrian*, post da polizia Puntraschigna
- Jäger Flavio*, post da polizia Tavau
- Kessler Jann Andrea*, post da polizia Tavau
- Kunath Dario*, post da polizia Tavau
- Pfiffner Astrid*, basa da la polizia da trafic San Bernardin
- Tschenett Enrico*, post da polizia Martina
- Walter Daniela*, post da polizia Mustér
- Zinsli Tiziano*, post da polizia Samedan
- Zurflüh Adrian*, post da polizia Arosa



Dà a la festa la noda musicala ha la Musica da la polizia chantunala.



Vitus Dermont, il president dal cussegl grond, flancà da dus policists durant l'act da brevetaziun.



Ils schefs da la polizia chantunala: cusseglier guvernativ *Christaian Rathgeb* e colonel *Walter Schlegel* (da san.).



Giasts tar la brevetaziun èn er stads *Marcel Suter*, schef da la polizia d'esters, *Hansueli Roth*, inspectur chantunal da pumpiers ed *Urs Marti*, il president da la citad da Cuira (da san.).



Tar ina festa da brevetaziun da la polizia dastgan betg mancar ils represchentants dal militar: *Lorenzo Rampa*, colonel da la Brigada da muntogna 12 ed adjutant *Arno Andreoli* (da san.).



Gratulaziuns da cusseglier guvernativ *Christian Rathgeb* per ils novs policists.